

DAAGLIKSE GEBEDSGIDS – MEI 2010

Saterdag 1 Mei 2010

Dag 19: Gebedsfokus op herlewing: Rus van werk

📖 **Hebreërs 4:10-11** ... want elkeen wat in die rus van God ingaan, rus van sy werk, net soos God van Syne. Laat ons ons dan beywer om in daardie rus in te gaan.

🔗 **Oordenking:** Dit is oënskynlik twee teenoorgesteldes: "rus van werk" en "beywer om in te gaan". Rus van werk beteken nie om niks te doen nie. Dit beteken dat 'besigwees vir God' nie noodwendig vir jou die vrede sal gee waarna jy soek nie. Hierdie vrede kom slegs wanneer jy geleer het om in intieme gemeenskap met God deur Jesus Christus te rus. Die strewe is om in te gaan; dit beteken om lang tye in God se teenwoordigheid deur te bring, en die Heilige Gees en Jesus toe te laat om in jou te bewerk wat jy self nie kan doen nie.

👤 **Persoonlik:** Die werk wat gedoen moet word, is om jou geloof te oefen. Om jou geloof te oefen moet jy jou in God se teenwoordigheid plaas, glo dat Hy jou hoor en op Hom wag om met jou te praat. Dan bly jy daar by Hom, terwyl jy partykeer luister, partykeer aanbid en partykeer die Woord se beloftes as't ware 'terugbid' na Hom. Here, help ons om in te gaan en U teenwoordigheid te ervaar!

♥ **Gemeente:** Bid dat God barmhartig sal wees en 'n gees van gebed op die kerk sal uitstort. Soek ander gemeentelede op en begin om saam te bid en God te soek vir jou gemeente.

Gebedsfokus op satanisme: Heksesabbat

1 Mei is gewoonlik die hoogtepunt van Beltane, 'n heksesabbat. Die verwagting in sataniese gelede is dat die volheid van die towerkuns wat geprogrammeer is gedurende die verskeie sataniese kringlope wat plaasgevind het, tydens hierdie volmaan sal manifesteer. Laat ons met groot vertrouwe bid dat hierdie bose verwagting verrydel sal word om op dié wyse die onvrugbare werk van die duisternis te openbaar (**Ef.5:11**). Bid dat God Hom sal openbaar aan diegene wat deur satanisme gevange geneem is. Bid dat hulle sal besef dat Jesus Christus werklik die Koning van konings is en hulle lewens aan Hom sal oorgee. (*Kanaan Ministries*. Posbus 15253, Panorama, 7506. Tel.: 021 930 7577, faks: 086 681 9458. Webruimte: www.kanaanministries.org of e-pos: kanaan@iafrica.com).

Sondag 2 Mei 2010

Dag 20: Gebedsfokus op herlewing: Die Woord is aktief

📖 **Hebreërs 4:12-13** Die Woord van God is lewend en kragtig. Dit is skerper as enige swaard met twee snykante en dring deur tot selfs die skeiding van siel en gees en van gewigte en murg. Dit beoordeel die bedoelings en gedagtes van die hart. Daar is ook niks in die skepping wat vir God onsigbaar is nie; alles lê oop en bloot voor Sy oë. En aan Hom moet ons rekenskap gee.

🔗 **Oordenking:** Die Woord van God is die swaard van die Gees. Ons verstaan dit gewoonlik binne die konteks van geestelike oorlogvoering teen die bose, maar hier is dit duidelik dat die eerste doel van die Woord is om ons harte binne te dring, en om daar die oorgeblewe duisternis in ons te konfronteer. Die Woord van God moet op so 'n wyse gelees en gebruik word dat die bedoelings van ons harte geopenbaar word. Is jy op so 'n wyse by die Woord betrokke?

👤 **Persoonlik:** Jou interaksie met God hang af van jou interaksie met Sy Woord. Die Woord is die Waarheid. Jou lewe moet by die Waarheid aangepas word. Wanneer jy die Woord lees, moet jy die Woord toelaat om jou lewe te ondersoek en jou van jou sonde te oortuig. Bely jou oortredinge en vra die Heilige Gees om jou optrede aan te pas in ooreenstemming met die Woord. Laat jou hart toe om naak en ontbloot voor God se oë te staan.

♥ **Gemeente:** In tye van herlewing kom geloofsoortuiging grotendeels wanneer die Woord in krag en in waarheid verkondig word. Bid dat die Kerk na die stewige fondament van die Woord sal terugkeer. Bid vir predikers wat die Woord sonder kompromie preek, sodat dit soos 'n swaard is wat mense se harte sal binnedring.

Maandag 3 Mei 2010

Gebedsfokus op die Wêrelddag van Gebed: Bid vir Sri Lanka, St Helena, St Kitts en Nevis en Sint-Vincent. Bid vir die redding van leiers op alle terreine van die lewe.

Dag 21: Gebedsfokus op herlewing: Jesus in die hemel

📖 **Hebreërs 4:14** *Terwyl ons nou 'n groot hoëpriester het wat reeds deur die hemele gegaan het, Jesus, die Seun van God, laat ons vashou aan die geloof wat ons bely.*

⚙️ **Oordenking:** Die werk van Jesus ons Hoëpriester het 'n tweeledige doel. Op die aarde het Hy Homself aan die kruis geoffer as die Lam van God. In die hemel sit Hy aan die regterhand van God en tree op as ons Hoëpriester en Voorspraak. Dit is nodig dat ons al twee ampte verstaan. Jesus verteenwoordig ons in die hemel, maar ons moet ook weet dat ons saam met Hom regeer vanuit die hemele (Ef.2:6).

👤 **Persoonlik:** Bely jy gereeld dat Jesus jou Hoëpriester is? Deur dit te doen gee jy erkenning aan Hom en die werk wat Hy doen. Jou interaksie met Hom as die Hoëpriester beteken ook dat die krag van die hemelse lewe tot jou beskikking is. As jy aan hierdie belydenis vashou, sal die houvas van die sonde en van die duiwel op jou lewe verbreek word. Kyk na Jesus in die hemel. Plaas jou vertrouwe op Hom en laat jou hart by Hom bly. Sy vrede sal dan in jou hart inkom.

♥️ **Gemeente:** Bid dat die Kerk die openbaring van Jesus as Hoëpriester sal ontvang. Bid dat hierdie waarheid die houding van die kerk oor sonde en Satan sal transformeer van een van tou opgooi na een waarin alle hindernisse oorkom kan word in ooreenstemming met God se beloftes.

Gebedsfokus op redding: Fabriekswerkers

Fabriekswerkers werk dikwels in skofte, wat hulle gesinslewe beïnvloed, veral wanneer hulle nagskof werk. Bid dat hulle Jesus sal vind as die antwoord en oplossing vir die praktiese probleme waarmee hulle te doen het en ook as die Verlosser van hulle lewens. Bid dat hulle lewens so verander sal word en dat hulle die Here sal verheerlik.

Dinsdag 4 Mei 2010

Gebedsfokus op die Wêrelddag van Gebed: Bid vir Sint-Vincent en die Grenadyne, Soedan and Suriname. Vra dat God se wil op die aarde gedoen sal word, net soos in die hemel.

Dag 22: Gebedsfokus op herlewing: 'n Simpatieke Hoëpriester

📖 **Hebreërs 4:15** *Die Hoëpriester wat ons het, is nie een wat geen medelye met ons swakhede kan hê nie; Hy was immers net soos ons aan versoeking onderwerp, maar Hy het nie gesondig nie.*

⚙️ **Oordenking:** Jesus is bekend met al die kwessies waarvoor die mens te staan kom. Hy het dit immers self ondervind. Hy het Homself ontledig van Sy goddelike mag sodat Hy werklik mens kon word. Hy is geduldig met ons swakhede omdat Hy presies weet hoe ons voel. Sy fokus is nie in die eerste plek om te oordeel nie, maar om ons te help om ons swakhede te oorwin net soos Hy ook die sonde oorwin het. As jy jou daarop instel om hierdie waarheid te verstaan, sal jou hart vertroos word en sal jy hoop ontvang dat jy van enige vorm van sonde vrygemaak en verlos kan word.

👤 **Persoonlik:** Jesus is ons vertrouwe waardig! Al wat nodig is, is dat ek myself onvoorwaardelik en volkome aan Hom oorgee. Ek moet nooit terneergedruk of teleurgesteld oor myself word omdat ek skynbaar nie 'n sondelose lewe kan voer nie. Ek moet myself volkome aan Hom onderwerp en op geen manier Sy planne met my teenstaan nie. Wil jy jouself nie nou volkome aan Hom oorgee nie?

♥️ **Gemeente:** Bid dat die Kerk 'n intense begeerte sal hê om 'n liggaam te word wat geheel en al en volkome sonder sonde is. Bid dat die Kerk ook so barmhartig en simpatiek teenoor sondaars sal wees as wat Jesus was. Laat ons ons veroordelende houding bely en die Here Jesus vra om Sy hart vir ons te gee.

Beplan vooruit vir die Wêreld Biddag van Gebed op 23 Mei 2010: Webruimte: www.globaldayofprayer.com

Woensdag 5 Mei 2010

Gebedsfokus op die Wêrelddag van Gebed: Bid vir Swaziland, Swede, Switserland and Sirië. Bid vir 'n toename in dag-en-naggebed in elke gehuggie, dorp en stad.

Dag 23: Gebedsfokus op herlewing: Vertroue om nader te gaan

📖 **Hebreërs 4:16** *Kom ons gaan dan met vertroue na Sy genadetron, sodat ons barmhartigheid en genade ontvang en so op die regte tyd gered kan word.*

⚙️ **Oordenking:** Ons vertroue is gegrond op die medelye en krag van ons Hoëpriester. Het jy hierdie vertroue? Hoe word Sy medelye en krag in jou lewe vertoon?

👤 **Persoonlik:** Oefen hierdie vertroue: 1. Gaan na God as die Een wat op die troon sit. Hy is genadig. Hy wag om jou te ontvang. Hy het jou lief. Bestee tyd om jou hart aan Hom te gee om hierdie waarhede te aanvaar en joune te maak. Buig voor Hom. 2. Gaan met vertroue en geloof dat Hy jou ter wille van Jesus sal ontvang. Vertroue beteken ek aanvaar die offer van Jesus; ek eer die werk wat Hy doen; ek eer die Vader; ek gee erkenning aan die Hoëpriester en wil gemeenskap met Hom hê. Terwyl jy bid en nadat jy gebed het, wees stil en dink na oor wat tussen jou en Hom gebeur. 3. Hoe meer jou siel met Jesus as die Hoëpriester besig is, hoe groter sal jou vertroue word. Hy wil met groot teerheid een wees met jou. Hy verstaan, Hy voel wat jy voel, Hy stel Hom in jou plek. Vertoef in Sy teenwoordigheid.

♥️ **Gemeente:** Bid dat die Kerk hierdie wonderlike waarheid sal begryp: By die troon van die Here kan die hele mensdom steeds genade en barmhartigheid vind. Dit is nog nie die tyd van oordeel nie. Bid dat elke lidmaat van die Kerk dit sal verstaan en van die geleentheid gebruik sal maak om na die troon te gaan en genade en ontferming te vind in 'n tyd van nood.

Tieners wat bid: Wil jy hê jou ouers moet verander?

Elkeen van ons het idees oor die ideale ouers en hoe ons wil hê hulle moet wees. Het jy al ooit daaraan gedink dat jy oor hierdie dinge vir jou ouers kan bid? Die Woord van die Here sê duidelik dat Hy gebede hoor – Hy sal ook na jou luister as jy tot Hom bid. Moenie vir 'n oomblik daaraan twyfel nie. Hier is 'n paar idees oor wat jy vir jou ouers kan bid. Gesels met 'n vriend/in daaroor en bid saam en kyk hoe die Here julle gebede beantwoord.


1. **Aanvaar dit...** Hulle is nie perfek nie. Of hulle nou baie by die huis is of nie, geskei is of weg van mekaar woon, hulle is jou ouers. Aanvaar dit. Dank die Here vir die voorreg om ouers te hê. Sê jammer vir die kere dat jy hulle 'weg-' of 'doodgewens' het oor iets wat hulle aan jou of iemand anders gedoen het of nie gedoen het nie. Bid dat die Here jou oë sal oopmaak om die goeie dinge te sien wat hulle doen, wat ander ouers nie doen nie. Vra die Here om jou te help om hulle nood raak te sien en vir jou die wysheid te gee oor hoe om vir hulle te bid.
2. **Lig hulle op in gebed ...** Bid dat die Here hulle sal help om jou behoeftes te verstaan en bid dat Hy jou ouers in staat sal stel om daaraan gehoor te gee en dat hulle die begeerte sal hê om tyd saam met jou deur te bring. Onthou dat wanneer hulle na jou uitreik, dit die Here se antwoord op jou gebede is – moenie vir hulle 'n koue skouer gee nie.
3. **Hulle werk...** Ekonomiese omstandighede het regtig hulle wêreld verander. Bid vir hulle dat hulle in staat sal wees om al die moeilike situasies by die werk te hanteer en dat hulle nie so moeg sal wees as hulle saans by die huis kom nie. Bid dat hulle guns by hulle werkgewers sal vind, vir goeie werksomstandighede en goeie salarisse. As hulle hulle eie sakeondernemings het, vra dat die Here vir hulle vrede by die werk sal gee, dat hulle met integriteit sal lewe en werk en dat hulle nie geld so sal najaag dat hulle nie vir hulle gesinne omgee of tyd maak vir gesinslewe en om die mooi dinge van die lewe te geniet nie.


4. **Hulle huwelik...** Luister mooi waarmee jou ouers sukkel. Vra die Heilige Gees om vir jou te wys hoe jy oor die dinge kan bid wat ongelukkigheid en pyn in hulle verhouding veroorsaak.
5. **Hulle verantwoordelikhede.....** Onderwerp jou aan hulle gesag en vra die Here om jou te help om jou aan hulle en hulle dissipline te onderwerp. Vra vir die Here dat hulle wysheid sal ontvang oor hoe om jou te lei en te help om tot volwassenheid te groei. Bid dat hulle hulle rolle as vader en moeder sal opneem, dat hulle godvresende lewens sal lei en deernis in hulle harte sal hê vir armes en behoeftiges.
6. **Hulle optrede teenoor jou...** Bid dat hulle geduldig met jou sal wees en dat die Here jou sal help om ook geduldig met hulle te wees. Onthou dat hulle ook maar net mense is en dat hulle baie foute maak. Moet hulle nie oordeel nie, maar wees lief vir hulle. Vra dat jou Hemelse Vader vir hulle wysheid sal gee en 'n openbaring om jou behoeftes en begeertes te verstaan en dat hulle tyd sal maak om jou te leer ken en lief te hê en beskikbaar sal wees wanneer jy hulle nodig het.


Donderdag 6 Mei 2010


Gebedsfokus op die Wêrelddag van Gebed: Bid vir Taiwan, Tadjikistan, Tanzanië en Thailand. Bid vir 'n honger en dors om God se Woord te bestudeer, te bid en te verkondig.

Dag 24: Gebedsfokus op herlewing: Genade en barmhartigheid

 **Hebreërs 4:16:** *Kom ons gaan dan met vertroue na Sy genadetroon, sodat ons barmhartigheid en genade ontvang en so op die regte tyd gered kan word*

 **Oordenking:** Ons vertroue is gegrond op dit wat ons oor God se karakter glo. Die Here se genade beteken dat wanneer ek na Hom toe kom met my skuld, sondigheid en onwaardigheid, ek daarvan verseker kan wees dat Hy my sonde sal vergewe en my sal aanvaar. Hy sal dit doen. God se genade beteken dat die innerlike hemelse werking van God se Gees binne-in my my volledig kan verander sodat ek 'n weerspieëling van Christus Self kan word.


 **Persoonlik:** Elke persoon moet vir hom-/haarself die genadige liefde van God toe-eien. Verstaan dat die ganse werk van Christus bedoel is om jou te laat kwalifiseer om met vertroue met God te kan verkeer. Wil jy Hom nie nou hiervoor dank nie? Sit 'n rukkie stil en dink oor Hom en aanbid Hom.


 **Gemeente:** Bid dat die Kerk hierdie genadige liefde van God sal ervaar, en om daarop te reageer met suiwer en nederige aanbidding. Bid dat die waarheid van God se liefde die Kerk in 'n gemeenskap vol liefde, genade en guns sal transformeer.

Vrydag 7 Mei 2010

Gebedsfokus op die Wêrelddag van Gebed: Dra Gambië, Togo, Tonga en Trinidad en Tobago aan die Here op. Bid vir die redding van leiers op alle terreine van die samelewing.

Dag 25: Gebedsfokus op herlewing: Ons Vertroue

 **Hebreërs 5:1-2** *Elke hoëpriester is 'n mens wat uit die mense geneem en aangestel word om vir hulle by God in te tree deur gawes en offers vir die sonde te bring. Hy kan meegevoel hê met die onwetendes en dwalendes omdat hyself aan swakheid onderhewig is.*

 **Oordenking:** Die twee vereistes vir 'n hoëpriester is dat hy deur God aangestel moet wees en ook moet kan simpatiseer met diegene wat hy voor God verteenwoordig. Jesus het aan beide hierdie vereistes voldoen. Jesus is deur God geroep om die mense voor Hom te verteenwoordig! Die werk van die Heilige Gees is om ons te oortuig van God se goeie bedoelings met ons en om ons te help om Jesus te vertrou deur ons die waarheid oor Hom te leer. Is jy oortuig dat God se bedoelings nét goed is?

☛ **Persoonlik:** Jesus is ook swak gemaak sodat Hy ons volledig kon verteenwoordig. Hy het Sy triomf verdien omdat Hy bereid was om soos mense te ly. Lyding en swakheid was Sy kenmerke op aarde. Nou in die hemel wil Hy almal verteenwoordig wat swak is en swaarkry. Dit is Sy ewigheidswerk: om jou te verteenwoordig! Wil jy hierdie Jesus leer ken?

Bid dat die Heilige Gees dit vir jou werklik sal maak en jou Sy verteenwoordiging sal laat ervaar.

♥ **Gemeente:** Bid dat die Kerk tot die besef sal kom dat die Here vir hulle is en nie teen hulle is nie. Bid dat hierdie besef 'n diepe nederigheid sal meebring, wat veroorsaak dat die Kerk nie trots en arrogant sal wees in hulle omgang met ongelowiges en sondaars nie. Bid dat die hart van Christus in die Kerk sigbaar sal wees.

Saterdag 8 Mei 2010

Dag 26: Gebedsfokus op herlewing: Christus as Hoëpriester

📖 **Hebreërs 5:4-5** *Niemand eien hom die eer as hoëpriester toe nie, hy word deur God daartoe geroep, net soos Aäron. So het Christus Hom ook nie die waardigheid as hoëpriester toegeëien nie, God het dit vir Hom gegee, toe Hy gesê het: "Jy is my Seun, van vandag af is Ek jou Vader. En op 'n ander plek sê Hy: "Jy is 'n priester vir ewig volgens die priesterorde van Melgisedek."*

⚙️ **Oordenking:** God het Jesus gekies as die mensdom se verteenwoordiger by Hom. Hy wou geen ander persoon of wese hê om die werk te doen nie, behalwe Sy seun. Dit was slegs Sy Seun wat God se hart vir mense verstaan het. Omdat Hy van God gekom het en na God teruggekeer het, kan Hy ons ook daarheen neem. Omdat Hy een is met God, kan Hy ons ook een maak met God. God het hierdie heerlike taak aan Hom toevertrou: die versoening tussen God en die mens.

☛ **Persoonlik:** Jesus ontvang groot eer wanneer Hy vir sondaars intree. Dit is waarom Hy gekom het en waarom Hy die heerlikheid wat Hy saam met die Vader gehad het, prysgegee het. Elke keer as ons tot Jesus pleit vir genade, ontvang Hy eer. Elke keer as ons 'n belofte van God glo en vir Jesus vra om dit te vervul, word Hy in die Vader se teenwoordigheid verheerlik. Wil jy Hom ook eer?

♥ **Gemeente:** Bid dat die Kerk die waarheid van God se Woord en Sy beloftes sal begryp en sal begin om Jesus daarvoor te eer deur tot Hom te bid en om vir Hom te vra om daardie beloftes te vervul. Geloof is presies dit – om te glo dat God se beloftes die waarheid is en dat dit vervul sal word as gevolg van Jesus.

Beplan vooruit vir die *Wêreld Biddag van Gebed* op 23 Mei 2010: Webruimte: www.globaldayofprayer.com

Sondag 9 Mei 2010

Dag 27: Gebedsfokus op herlewing: Jesus se trane

📖 **Hebreërs 5:7-8** *Gedurende sy aardse lewe het Hy aan God, wat Hom uit die dood kon red, gebede en smeking geoffer met harde geroep en met trane. En sy gebede is verhoor vanweë sy eerbiedige onderworpenheid aan God. Alhoewel Hy die Seun was, het Hy deur alles wat Hy gely het, geleer wat gehoorsaamheid is.*

⚙️ **Oordenking:** Wat Jesus vir ons wou doen, moes hy eers vir Homself doen. Om te kwalifiseer vir die werk om ons te heilig, moes Hyself eers geheilig word. Hy moes leer om as 'n menslike wese in 'n verhouding met God te staan. Die feit dat Hy met 'n luide stem en trane gebid het, dui op Sy geweldige worsteling met die swakhede van mense. Hy het Sy eie wil tersyde gestel en die angs vir die dood deurgemaak omdat Hy die beloftes van God verstaan en gehoorsaam aan God se wil was.

☛ **Persoonlik:** Die toets vir Jesus was gehoorsaamheid. Wat Hy gedoen het, wil Hy ons ook leer doen. Hy weet wat dit kos om jou eie wil prys te gee. Hy ken ook die krag wat vrygestel word as 'n persoon dit kan doen. Sy dood en opstanding stel ons in staat om Sy voorbeeld te volg omdat Sy hemelse krag tot ons beskikking is. Vertrou jy Christus genoeg om bereid te wees om Hom die hele pad te volg? Kom dan na Hom toe en praat met Hom oor jou gehoorsaamheid.

♥ **Gemeente:** Bid dat die Kerk die waarheid sal hoor oor die groot werk wat Jesus gedoen het en dat die waarheid die Kerk in staat sal stel om volkome gehoorsaam te wees aan die wil van God. Bid dat God se wil uitgevoer sal word in die lewe van elke lidmaat van jou gemeente.

Maandag 10 Mei 2010

Gebedsfokus op die Wêrelddag van Gebed: Bid vir Tunisië, Turkye, Toerkmenistan en die Turks- en Caicos-eilande. Vra dat mense se denke voor God se waarheid sal swig.

Dag 28: Gebedsfokus op Herlewing: Die volmaaktheid van Jesus

📖 **Hebreërs 5:8-9** *Hoewel Hy die seun was, het Hy deur alles wat Hy gely het, geleer wat gehoorsaamheid is. En toe Hy volmaaktheid bereik het, het Hy vir almal wat aan Hom gehoorsaam is, die bron van ewige saligheid geword.*

⚙️ **Oordenking:** Daar is baie min mense wat daarna streef om volmaak te word, hoofsaaklik omdat ons baie min rolmodelle het wat hierdie posisie bereik het en ook omdat ons nie kan glo dat dit moontlik is dat iemand so 'n vlak van heiligheid kan bereik nie. Jesus was 'n volmaakte mens. Hy het gedoen wat niemand in die Ou Testament kon vermag nie. Deur Sy oorwinning oor versoeking en sonde het Hy vir ons die perfekte voorbeeld gestel. Die pad na volmaaktheid is om te kies om ons eie wil neer te lê en om volkome aan God gehoorsaam te word. Dit is die geheim om die mag van sonde en Satan te breek.

👤 **Persoonlik:** Die sleutel tot 'n lewe vol van vrede, vreugde en krag is gehoorsaamheid aan God. Jesus se gehoorsaamheid, die neerlê van Sy eie wil, Sy dood en opwekking stel my en jou in staat om gehoorsaam aan God te word. Dit gebeur met gebed, uitroep en baie tranes. Die roeping is duidelik: Lê jou eie wil neer en gehoorsaam God. Is dit nie waarna jou hart verlang nie? Kom na God en neem die eerste stap in gehoorsaamheid – gee aan Hom jou wil. Vra Hom die genade om met elke tree aan Hom gehoorsaam te wees.

♥ **Gemeente:** 'n Kerk wat kompromieë aangaan, is swak en kan nie verwag om impak te maak op die lewens van ongelowiges nie. Die wêreld moet nog sien wat 'n Kerk kan doen wat volkome aan God gehoorsaam is. Bid dat die kerk in ons tyd tot hierdie groot en hoë roeping sal kom – totale gehoorsaamheid aan God se wil.

Dinsdag 11 Mei 2010

Gebedsfokus op die Wêrelddag van Gebed: Bid vir Toewaloe, Uganda, die Oekraïne en die Verenigde Arabiese Emirate. Bid dat mense hulle tot God sal bekeer.

Dag 29: Gebedsfokus op herlewing: Waarskuwing teen selftevredeheid

📖 **Hebreërs 5:10-13** *...en is Hy deur God verklaar tot Hoëpriester volgens die orde van Melgisedek. In verband hiermee het ons baie te sê wat moeilik is om aan julle te verduidelik, aangesien julle so traag is om te leer. Hoewel julle teen hierdie tyd self reeds onderrig behoort te gee, het julle weer nodig dat iemand julle in die grondwaarhede van die woord van God moet onderrig. 'n Mens moet julle met melk voed en nie met vaste kos nie. Iemand wat nog van melk lewe, kan nie saampraat oor wat reg of verkeerd is nie, want hy is nog 'n kind.*

⚙️ **Oordenking:** Geestelike traagheid maak die siel immuun teen die verstaan van geestelike dinge. Die traagheid kom wanneer Gelowiges net tevrede is daarmee dat hulle Gelowiges is. Hulle harte raak verstrik in die wêreld en hulle het baie min begeerte om in te gaan op die dieper geestelike waarhede van die lewe en geloof en die krag van Christus. Om die hemelse priesterskap van Christenskap te verstaan en na waarde te ag, moet mense se denke gefokus wees op die hemelse Jesus, met 'n ontevredenheid oor die normale Christelike lewe soos ons dit ervaar, 'n begeerte vir volkome verlossing, 'n gewilligheid om alles op die altaar te lê om Christus te volg en om die krag van die onvernietigbare lewe in Hom te beleef.

👤 **Persoonlik:** Dit is baie gevaarlik om 'n onvolwasse Gelowige te bly en nooit tot volwassenheid te groei nie. Dit is om net tevrede te wees dat jy nie hel toe sal gaan nie. Jou lewe is dan steeds een wat net jouself, maar nie vir God tevrede stel nie. Kom na die hemelse Jesus en spreek jou begeerte uit om te groei totdat jy Hom in Sy volheid ken, ongeag die prys.

♥ **Gemeente:** Bid dat die lidmate van die Kerk ontevrede sal raak met die *status quo* in die kerk. Bid vir 'n diep innerlike dringendheid om te groei in kennis en verstaan van die hemelse dinge. Bid dat daar leiers in die Kerk sal wees wat 'n lewenstyl van volkome gehoorsaamheid stel en dit ook vir ander leer.

Woensdag 12 Mei 2010

Gebedsfokus op die Wêrelddag van Gebed: Bid vir die Verenigde Koninkryk, die Verenigde State van Amerika en Uruguay. Bid vir 'n ontvanklikheid vir die evangelie.

Dag 30: Gebedsfokus op herlewing: Volwassewording

📖 **Hebreeërs 5:12-14.** *Hoewel julle teen hierdie tyd self reeds onderrig behoort te gee, het julle weer nodig dat iemand julle in die grondwaarhede van die woord van God moet onderrig. 'n Mens moet julle met melk voed en nie met vaste kos nie. Iemand wat nog van melk lewe, kan nie saampraat oor wat reg of verkeerd is nie, want hy is nog 'n kind. Vaste kos is vir grootmense, vir mense wat oor insig beskik en wat deur ervaring ge oefen is om tussen goed en kwaad te onderskei.*

⚙️ **Oordenking:** Wat is die verskil tussen 'n kind en 'n volwasse Christen? 'n Kind verstaan net die eerste, maklike dinge. 'n Volwasse Gelowige ken Christus as die Hoëpriester en die krag van Sy hemelse lewe. 'n Kind ken Christus slegs as die een wat gekruisig is, die aardse priester wat so versoening tussen God en die mens bewerk het. 'n Volwasse Gelowige verstaan die hemelse krag van die bloed en die lewe saam met God in die Allerheiligste. Gehoorsaamheid verrig 'n unieke werk in die hart van die Gelowige. Hulle is ge oefen in gehoorsaamheid, in deurstellingsvermoë om die dinge van die wêreld en die vlees te oorwin, kan tussen goed en kwaad onderskei, ken God se stem en gehoorsaam Hom. Hulle gewetes is ge oefen om net vir God te behaag. Alhoewel hulle nog nie volmaak is nie, rus hulle in Hom en gehoorsaam hulle Hom wat volmaak is.

👤 **Persoonlik:** Wil jy hierdie hemelse sensitiwiteit oor sonde besit? 'n Sensitiewe hart om God se wil in elke opsig van jou lewe te ken? Indien wel, sal die Heilige Gees en die Woord van God jou lei om Christus as die hemelse Hoëpriester te leer ken. Spreek jou begeerte uit om in die kennis van God te groei en wees elke dag getrou om jou geloof te oefen. Vertrou dat Jesus Christus die werk in jou volkome sal maak.

♥ **Gemeente:** Bid dat die Kerk van die Here 'n volwasse Bruid sal word, wat uitkyk en wag vir haar Bruidegom. Bid dat leraars, predikers en Bybelonderwysers sal ophou om die Kerk slegs met melk te voed, maar sal begin om hulle met die vaste waarhede van God se Woord te leer, sodat die Kerk volwasse kan word en haar rol kan vervul.

Donderdag 13 Mei 2010

Gebedsfokus op die Wêrelddag van Gebed: Bid vir Oesbekistan, Vanuatu, Venezuela and Viëtnam. Bid vir die totstandkoming van huise van gebed.

10 Dae van dag-en-nag-gebed: Dag 1

HERLEEF

Ons Vader wat in die hemel is ...

- Bid tot God om Sy mense as een familie voor Hom te laat herleef en te verenig.
- Bid dat eiesinnige Christene berou sal hê en sal terugkeer na God die Vader, en sal leer om Hom te gehoorsaam en te vertrou.
- Bid vir nuwe bewegings van gebed wat volhardend die troon van genade sal opsoek.

(*Transformation Africa*. Posbus 3856, Somerset-Wes, 7129. Tel.: 021 856 3130 of faks: 086 675 8584 / 021 856 1174. Webruimte: <http://www.globaldayofprayer.com> of e-pos: info@globaldayofprayer.com).

Beplan vooruit vir die <i>Wêreld Biddag van Gebed</i> op 23 Mei 2010: Webruimte: www.globaldayofprayer.com

Vrydag 14 Mei 2010

Gebedsfokus op die Wêrelddag van Gebed: Bid vir die Amerikaanse Maagde-eilande en Wallis en Futuna. Bid dat God se wil op aarde sal geskied net soos in die hemel.

10 Dae van dag-en-nag-gebed: Dag 2

OPENBAAR

... heilig U Naam

- Bid dat die waarheid van God se karakter grootgemaak en geëer sal word.
- Bid dat God Hom sal bekend maak as die ware God teenoor valse gode en om elke leuen wat oor Hom gesê word, aan die lig te bring.
- Bid dat die Woord van God in elke nasie en plek op die aarde verkondig sal word.
- Bid dat die Skrifte in alle tale vertaal en beskikbaar gemaak sal word.

'n oproep OM TERUG TE DRAAI

Maar nou sê die Here: Kom met julle hele hart terug na My toe, vas, huil en treur! (Joël 2:12).

Lees **Joel 2:12-14** hardop. Dink aan hoe hierdie uur net so 'n kritieke oomblik kan wees as in Joël se tyd, 'n "maar nou"-oomblik. Om verskeie redes het baie van God se mense van Hom weggedryf. Maar nou roep Hy ons om met ons hele hart na Hom terug te kom. Om terug te keer na God behels meer as om terug te gaan kerk toe en weg te draai van die sonde af; dit beteken om ons volle aandag aan God te gee, om met vertroue in Sy wonderbaarlike liefde naby aan Hom te kom. As ons na Hom terugkom, wil Hy ook na ons toe kom. Sy magtige liefde red ons nie net van ons sonde nie, maar gee ons ook Sy seën en bemagtig ons om Hom in oorvloedige dankbaarheid te aanbid. (*Transformation Africa*. Posbus 3856, Somerset-Wes, 7129. Tel.: 021 856 3130 of faks: 086 675 8584 / 021 856 1174. Webruimte: <http://www.globaldayofprayer.com> of e-pos: info@globaldayofprayer.com).

Kinders wat bid: Wat kan jy vir Mamma en Pappa doen?

Soms voel jy so eensaam en eintlik in die pad wanneer dit nie goed gaan by die huis nie of wanneer Mamma en Pappa baklei. Is dit jou fout? Kan jy regtig iets doen om dinge te verander sodat dit met hulle beter kan gaan? Soms wil jy net vir hulle wys dat jy lief is vir hulle en dat jy hulle wil help met al die moeilike dinge wat hulle moet doen. Daar is iets wat jy kan doen wat baie kragtig is en wat sal werk: Jy kan jou Hemelse Vader vra om hulle te help. Jou gebede kan regtig hulle lewens verander, dit is een van die belangrikste dinge wat jy kan doen. Waarom begin jy nie om vir jou ouers saam met een van jou vriende wat jy kan vertrou, vir 5 minute van die skoolpouses te bid of in die aande voor etenstyd nie? Moenie wag tot jy gaan slaap nie, want dan is jy dalk te moeg om te bid. Hier is 5 dinge waarvoor jy kan bid:

1. **Eensaam...** Wanneer hulle baklei, voel hulle baie eensaam, veral as hulle kwaad gaan slaap. Elke keer as jy hulle hoor baklei, of as hulle ongelukkig is, gaan soek 'n plekkie waar jy 'n paar minute alleen met die Here kan wees en vra Sy hulp. Vra dat Jesus vir hulle vrede sal gee en dat hulle sal verstaan hoe lief Jesus hulle het.
2. **Bang...** In baie huise is geld 'n probleem. Party keer is daar nie genoeg geld nie. Vra jou Hemelse Vader om julle as 'n gesin te help. Onthou dat Jesus ons geleer het om te bid: Ons Vader wat in die hemel is, gee ons vandag ons daaglikse brood. Vra en jy sal sien hoe die Here in alles voorsien. En baie keer sal dit vir Mamma en Pappa help as jy na hulle toe gaan en vir hulle vra of jy vir hulle kan bid dat die Here in al hulle behoeftes sal voorsien.
3. **Kwaad vir jou...** Soms doen jy iets en jy besef na die tyd dit was verkeerd. Bid dat hulle jou sal help om die regte dinge te doen en jou die regte pad te wys. Bid en vra die Here om hulle te help om jou te vergewe en maak seker dat jy sê jy is jammer.

4. **Help...** As jou ouers by die huis kom, kyk of daar iets is waarmee jy hulle kan help. Soms kan jy aanbied om vir hulle 'n koppie koffie of tee te maak, die skottelgoed te was of die tafel af te vee. Vra vir die Here om vir jou klein dingetjies te wys wat hulle trots op jou sal maak en jou vir hulle 'n seën sal maak. As jy so na hulle toe uitreik, sal dit beslis hulle harte en gesindheid teenoor jou verander.
5. **Hulle verhouding...** Bid vir hulle om in vrede met mekaar te leef. Vra ook vir hulle om soms saam iets by die huis te doen as 'n gesin en bid dat die Here hulle gewillig sal maak om dit te doen. Sê vir hulle dat jy lief is vir hulle en dat jy tyd saam met hulle wil deurbring. Hulle besef nie altyd dat jy hulle nodig het nie.

Saterdag 15 Mei 2010

10 Dae van dag-en-nag-gebed: Dag 3

HEERS

... Laat U koninkryk kom ...

- Bid dat baie deur die krag van die evangelie getrek sal word om hulle lewens aan Jesus Christus te gee, om Hom lief te hê en om Hom as Koning te volg.
- Bid dat Christus se volgelinge in die volheid van God se Gees sal wandel sodat hulle na die beeld van Christus kan leef.
- Bid dat die Heerskappy van Christus ons stede en gemeenskappe as geheel sal beïnvloed.

(Transformation Africa, Posbus 3856, Somerset-Wes, 7129. Tel.: 021 856 3130 of faks: 086 675 8584 / 021 856 1174. Webruimte: <http://www.globaldayofprayer.com> of e-pos: info@globaldayofprayer.com).

Sondag 16 Mei 2010

10 Dae van dag-en-nag-gebed: Dag 4

VERANDER

... en laat U wil geskied, op die aarde net soos in die hemel ...

- Bid dat God se kinders die invloed en seën van Christus na alle fasette van besigheid, kuns, onderwys en regering sal bring op maniere wat blywende transformasie sal meebring.
- Bid dat die Here se wysheid oor ons regeringsleiers sal kom om veranderings aan te bring wat reg en geregtigheid sal bevorder.
- Bid dat die geregtigheid, vrede en blydschap van Christus se koninkryk deur die krag van die Heilige Gees 'n werklikheid sal word.

'n oproep om BYMEKAAR TE KOM

Roep die volk op... en hulle moet sê: "Betoon medelye met u volk, Here ..." Waarom moet daar onder die volke gevra word: 'Waar is Israel se God?'" (Joël 2:16-17).

Lees **Joël 2:15-17**. Om as 'n volk berou te toon, moet ons saam voor God kom. Hy wil ons as 'n volk ontmoet. Dit is waarom Hy ons beveel om ons normale roetine te verbreek sodat ons in groot en klein groepe voor Hom kan verskyn. Dit is 'n tyd om die daaglikse gewoontes te onderbreek, om te vas van ons normale dieet, selfs om van ons bekende aanbiddingsgewoontes weg te beweeg en op spesiale maniere byeen te kom. Waarom hierdie dringendheid? Omdat iets groots vir God se heerlikheid op die spel is. Laat ons ons harte toelaat om te rou oor wat ons, as God se mense, gedoen het om Sy naam in oneer te bring. Vir die wêreld wat toekyk, kan dit lyk asof ons nie 'n God het nie. Dink 'n bietjie aan dinge wat die Here se hart bedroef, en bid dat ons sal verander om sodoende die eer aan Hom te bring wat Hom toekom. (Transformation Africa, Posbus 3856, Somerset-Wes, 7129. Tel.: 021 856 3130 of faks: 086 675 8584 / 021 856 1174. Webruimte: <http://www.globaldayofprayer.com> of e-pos: info@globaldayofprayer.com).

Maandag 17 Mei 2010

Gebedsfokus op die Wêrelddag van Gebed: Bid vir Jemen, Zambië and Zimbabwe. Bid vir 'n honger en 'n dors om God se Woord te bestudeer, te bid en te verkondig.

10 Dae van dag-en-nag-gebed: Dag 5

VOORSIEN

... Gee ons vandag ons daaglikse brood ...

- Bid vir die basiese behoeftes van kos, water en gesondheidsorg vir armes, siekes, vlugteling en kinders.
- Bid dat God se mense, met die hulp van Sy Gees, agente van genesing en verandering sal wees wat die oorvloed, geregtigheid en vrede wat God verlang, sal voortbring.
- Bid dat God se mense die armoede-kringloop in hulle gemeenskappe sal verbreek, om daarmee God se belofte van seën onder alle nasies te vervul.
- Bid dat Christene met deernis en volharding sal optree om siektes uit te wis en om diensbaar te wees tydens epidemies soos MIV/VIGS.

(Transformation Africa, Posbus 3856, Somerset-Wes, 7129. Tel.: 021 856 3130 of faks: 086 675 8584 / 021 856 1174. Webruimte: <http://www.globaldayofprayer.com> of e-pos: info@globaldayofprayer.com).

Dinsdag 18 Mei 2010

10 Dae van dag-en-nag-gebed: Dag 6

VERGEWE

...Vergewe ons sondes ...

- Bid dat die Gees van God in die harte van mans en vroue sal werk sodat hulle kan sien hoe bedroef God is en hoe hulle lewens deur sonde verwoes word.
- Bid dat die Gees van God mense sal bemagtig om hulle sonde te laat vaar en die genade te ontvang om hulle verbintenis met die magte van die duisternis af te sweer.
- Bid vir die erkenning van en berou oor sondes wat tot oorlog, armoede en ongeregtigheid aanleiding gee.

'n oproep tot HOOP

Die Here het vir sy land opgekom, Hy het medelye betoon met sy volk ...Jy moenie bang wees nie ... jy moet bly wees en juig ... want die Here het 'n wonder gedoen ... (Joël 2:18, 21).

Lees **Joël 2:18-22**. Ons behoort ywerig te wees om berou te toon omdat God so jaloers is op Sy naam en Sy mense. Vanweë God se groot liefde kan ons berou vrymoedig en vreesloos wees. Ons God sal afreken met die magte wat ons gemeenskappe vernietig. Al is die boosheid ook hoe groot, sal God selfs groter dinge doen. Sulke hoop bring blydschap as ons ons in opregtheid na God wend, in die wete dat Hy begeer om Sy goedheid oor die hele aarde te bring, ons stede te transformeer, ons ekonomieë te herstel en ons nasies heel te maak. (Transformation Africa, Posbus 3856, Somerset-Wes, 7129. Tel.: 021 856 3130 of faks: 086 675 8584 / 021 856 1174. Webruimte: <http://www.globaldayofprayer.com> of e-pos: info@globaldayofprayer.com).

Woensdag 19 Mei 2010

10 Dae van dag-en-nag-gebed: Dag 7

VERSOEN

... soos ons dié vergewe wat teenoor ons sondig ...

- Bid dat mense die kringloop van wrokkigheid, wraak en rassisme sal verbreek sodat verhoudings herstel kan word.
- Bid vir tekens van Christus se versoeningskrag te midde van militêre konflik, wat God se wil sal openbaar om alle oorloë te beëindig.
- Bid vir die herstel van verhoudings tussen mans en vroue, vir versoening in huwelike en vir nuwe, heel verhoudings tussen kinders en hulle ouers.

- Bid vir hulle wat ter wille van die Naam van Christus ly, dat hulle deur die Gees en genade van Christus die vervolging sal kan verduur.

(Transformation Africa, Posbus 3856, Somerset-Wes, 7129. Tel.: 021 856 3130 of faks: 086 675 8584 / 021 856 1174. Webruimte: <http://www.globaldayofprayer.com> of e-pos: info@globaldayofprayer.com).

Donderdag 20 Mei 2010

Wêrelddag van Gebed 2010 Konferensie

Om God se heerlijkheid te vier, sal leiers van verskillende netwerke en bedienings (Gebed, Transformasie, Sending, Kerk en Jeug) vanoor die wêreld in Kaapstad byeenkom vir die *GDOP2010 Konferensie* op 20-21 Mei 2010, om die "onvertelde stories" van die "onbekende helde van die geloof" te kom vertel! Bid dat die konferensiegangers tyd aan gebed en danksegging sal afstaan om God te eer vir wie Hy is. Vra vir oop harte en gemoedere om God se stem te hoor en Sy doel vir die tydperk wat voorlê, te verstaan. (Transformation Africa, Posbus 3856, Somerset-Wes, 7129. Tel.: 021 856 3130 of faks: 086 675 8584 / 021 856 1174. Webruimte: <http://www.globaldayofprayer.com> of e-pos: info@globaldayofprayer.com).

10 Dae van dag-en-nag-gebed: Dag 8

LEI

... en lei ons nie in versoeking nie ...

- Bid dat Christene met soveel liefde en ywer om God te behaag, vervul sal word, sodat hulle onbeweeglik sal bly te midde van versoekings soos dié van materialisme en seksuele perversiteit.
- Bid dat God se mense sal aanhou om in die lig van Sy weë en wysheid te wandel om so dwarsdeur die wêreld aan Sy doelstellings uitvoering te gee.
- Bid dat God leiding aan besigheids-, opvoedkundige en regeringsleiers sal gee sodat die vloek van korrupsie in alle stede en die ekonomie verbreek kan word.

'n oproep om FEES TE VIER

Julle sal oorgenoeg hê om te eet, julle sal die Naam van die Here julle God prys, Hy wat wonders vir julle gedoen het (Joël 2:26).

Lees **Joël 2:23-27**. Wanneer God se mense met hulle hele hart na Hom terugkeer, is daar 'n belofte van tasbare veranderinge en groot blydschap in hulle gemeenskappe. Waar daar die vloek van verdrukkende armoede was, is dit God se begeerte om in oorvloed te voorsien sodat baie Sy naam in dankbaarheid sal aanroep en prys. 'n Selfs groter skouspel sal volg wanneer God Sy woning in Sy mense se midde sal oprig. Hy sal wonderbaarlik optree in sowel goedheid as mag, en die wêreld verras deur Sy teenwoordigheid onder sy mense te openbaar.

(Transformation Africa, Posbus 3856, Somerset-Wes, 7129. Tel.: 021 856 3130 of faks: 086 675 8584 / 021 856 1174. Webruimte: <http://www.globaldayofprayer.com> of e-pos: info@globaldayofprayer.com).

Vrydag 21 Mei 2010

10 Dae van dag-en-nag-gebed: Dag 9

OORWIN

... maar verlos ons van die bese ...

- Bid dat God Sataniese magte sal teenstaan, die waarheid van die evangelie bekend sal maak en baie mense sal vrymaak om Christus te volg.
- Bid dat mense bevry sal word van afgodery, towerkuns, demoniese onderdrukking en depressie.
- Bid dat Christus die magte van die duisternis sal verbreek wat besighede, die regering en stede domineer en korrup maak.

(Transformation Africa, Posbus 3856, Somerset-Wes, 7129. Tel.: 021 856 3130 of faks: 086 675 8584 / 021 856 1174. Webruimte: <http://www.globaldayofprayer.com> of e-pos: info@globaldayofprayer.com).

Saterdag 22 Mei 2010

10 Dae van dag-en-nag-gebed: Dag 10

VERHEERLIK

... want aan U behoort die koninkryk en die krag en die heerlijkheid tot in ewigheid. Amen.

- Bid dat tekens van Christus se koninkryk die aarde so sal vul dat baie mense beweeg sal word om te hoop op Sy wederkoms.
- Bid dat Christus se mag gesien sal word in die nederige en barmhartige diens van Sy mense.
- Bid dat Jesus openlik geëer sal word, deur massas aanbid sal word en wêreldwyd verheerlik sal word.

'n oproep om te OPENBAAR

Lees **Joël 2:28-32** en dink aan hoe hierdie beloftes tot 'n groter mate vervul kan word as ooit tevore. Wend jou met afwagting tot God. Hy is op die punt om sy plan van redding vir die hele wêreld bekend te maak. Selfs in tye van angswekkende beroering en swaarkry sal Hy Sy Gees uitstort sodat mense regoor die aarde – oues en jonges, arm en ryk, mans en vroue – die oproep van God uit alle rasse en alle plekke sal laat opklink. (*Transformation Africa*, Posbus 3856, Somerset-Wes, 7129. Tel.: 021 856 3130 of faks: 086 675 8584 / 021 856 1174. Webruimte: <http://www.globaldayofprayer.com> of e-pos: info@globaldayofprayer.com).



Sondag 23 Mei 2010

Pinkstersondag: Wêrelddag van Gebed

Christene in al die lande van die wêreld het hulle daartoe verbind om vandag te verenig vir 'n dag van gebed en berou in die grootste wêreldwye gebedsbyeenkoms ooit. As die Liggaam van Christus wêreldwyd, sal ons vergifnis vra vir ons sondes, bid vir ons lande, vir die heling van die nasies en die transformasie van gemeenskappe en nasies oor die wêreld heen. Ons sal bid vir die uitstorting van die Heilige Gees op die Kerk aan die hand van **Joël 2**. Deur die eeue heen het die Here telkens die Heilige Gees op duisende plekke regoor die hele wêreld uitgestort. Laat ons vandag tot Hom roep dat Hy weereens Sy Kerk in die tien duisende plekke waar mense vandag bymekaarkom, sal besoek. Laat ons met geloof en vrymoedigheid bid (**Hand.1:8**) dat tekens en wonderwerke en gesondmaking en kragtige dade die manifestasies van die gawes van die Heilige Gees sal vergesel (**Hand.4:32; Heb.2:4**). Laat ons vir geestelike deurbrake bid vir mense wat in duisternis lewe in die Midde-Ooste, Europa, China, Indië en baie ander plekke in die wêreld.

'n Gebed vir die wêreld: 'n Spesiale gebed wat in eensgesindheid by elke *Wêrelddag van Gebed*-byeenkoms gelees sal word, is voorberei en in baie tale vertaal. Baie van hierdie vertalings is beskikbaar op die webruimte: www.globaldayofprayer.com

Praktiese wenke om vandag in gebed deur te bring:

-  **Bid saam met jou plaaslike gemeente:** Wy gedeeltes van die oggenddiens op Pinkstersondag aan gesamentlike gebed. Maak die feit bekend dat miljoene mense oor die wêreld heen byeenkom om tot die eer van Jesus Christus en vir die transformasie van alle nasies te bid. Lees die *Gebed vir die Wêreld* voor vir die gemeente. Vertel hoe mense gedurende die tien dae gebid het. Oorweeg gesamentlike dienste met nabygeleë gemeentes.
-  **Kom in huise of openbare plekke byeen:** Christene oor die wêreld heen beplan om op die middag en die aand van Pinkster in hulle huise, stadions, openbare auditoriums en oop pleine bymekaar te kom. Party byeenkomste sal klein wees en ander groot, maar almal sal met dieselfde hart en visie bid vir berou en hoop. Soos tydens die eerste Pinksterfees (toe die seën van Christus in die strate en openbare plekke gemanifesteer het) sal ons God openlik in die Naam van Christus aanbid en bid dat die nasies gesond gemaak en geseën sal word. Ons probeer om sover moontlik by plekke buite die mure van ons kerkgeboue byeen te kom.

Maandag 24 Mei 2010

Gebedsfokus op redding: Onwettige immigrante/vlugtelinge

Die meeste onwettige immigrante in Suid-Afrika moes uit hulle lande vlug as gevolg van oorloë. Hulle lewens was in gevaar en daar was nie kos of 'n inkomste nie. Dra al hierdie mense binne ons landsgrense in gebed aan die Here op. Bid dat hulle uit die getuienis van Suid-Afrikaners Jesus Christus as die antwoord op hulle lewensvrae sal kry. Bid dat hulle self ook ander sal lei om Christus te vind. Bid dat hulle ten spyte van hulle nood nie by misdaad en geweld betrokke sal raak nie, maar tot God sal roep vir hulp.

Wêrelddag van Gebed: Dank vir God se goedheid

Dank die Here dat Hy gister miljoene mense regoor die wêreld byeengebring het om vir hulle lande, die Kerk en mense wat nie gered is nie, te bid. Eer Sy naam dat Hy die lewens van miljoene aangeraak het en deernis vir hulle het. Dank Hom vir elke gebed wat Hy verhoor het. Laat ons saam met elke lewende wese in die hemel, op aarde, onder die aarde en in die see, God aanroep en sê: "*Aan Hom wat op die troon sit en aan die Lam, behoort die lof en die eer, die heerlijkheid en die krag, tot in alle ewigheid!*" (**Op.5:13**).

Dinsdag 25 Mei 2010

Gebedsfokus op kinders: Internasionale dag vir vermiste kinders

National Missing Children's Day het op 25 Mei 1983 in Amerika begin. In 2009 het agt lande, insluitend Suid-Afrika, by die *International Centre for Missing and Exploited Children (ICMEC)* aangesluit om die *International Missing Children's Day* onder mense se aandag te bring, bewustheid te kweek vir die kwessie van vermiste kinders en ook 'n boodskap van hoop vir ouers, gesinslede en geliefdes van vermiste kinders te bring. (Webruimte: http://www.icmec.org/missingkids/servlet/PageServlet?LanguageCountry=en_X1&Pageld=4050). Bid vandag vir al die kinders wat nog gevind moet word. Bid vir hulle beskerming, dat hulle geleenthede sal kry om te ontsnap en veilig terug te kom na hulle ouers. Bid ook vir troos vir die ouers wat na hulle vermiste kinders soek.

Gebedsfokus op Bybelvertaling: El Salvador

'n Bybelvertaling in Salvadoriese Gebaretaal is in 'n vroeë stadium. Bid vir eensgesindheid vir die projekspan, en vir krag en deursettingsvermoë om die projek te voltooi. Vra vir God se voorsiening en leiding om dit vir die dowe mense in El Salvador beskikbaar te maak. Baie dowe mense verstaan min of niks van 'n gedrukte Spaanse Bybel nie; daarom sal die gebaretaalvertaling die Bybel op 'n heeltelmal nuwe manier aan hulle beskikbaar stel. (Lars Widerberg, *Intercessors Network*, Storskiftesgatan 87, S-58334 Linköping, Sweden. E-pos: Intercessors.Network@Comhem.se or Intercessors.Network@Telia.com).

Sendingfokus: Kerkplanting

Volgens navorsing, en ook volgens sendelinge in die veld, bly kerkplanting die mees effektiewe vorm van evangelisasie en Kerkgroei. Die afgelope 30 jaar is gekenmerk deur 'n hernude fokus op kerkplanting. Wanneer ons vir die uitbreiding van God se koninkryk bid, moet ons veral bid vir die oprigting van nuwe kerkplanters. In Suid-Afrika is daar minstens 20 miljoen mense wat buite die kerk staan: animiste, ateïste, ongelowiges, ens. Indien ons hierdie mense in kerke wil sien, is daar 40 000 nuwe gemeentes nodig met 'n gemiddeld van 500 lidmate. Ongeag hoe ons hieroor dink of redeneer, daar is dringend baie en goed opgeleide kerkplanters nodig.

Is daar hedendaagse voorbeelde van suksesvolle kerkplanting? Hier is 'n paar bemoedigende voorbeelde van antwoorde op gebed:

✚ In **Suidoos-Asië** het 'n kerkplanter in 1993 in 'n area begin werk waar daar net 3 kerke en 85 lidmate onder 7 miljoen mense was. Slegs 4 Jaar later was daar 550 kerke en 55 000 lidmate.

✚ In een stad in **China** het daar in 'n 4 jaar periode (1993-1997) 20 000 mense tot geloof gekom en 500 nuwe gemeentes is geplant.

- ✚ Nog 'n sendeling doen verslag uit **Asië** dat hy en sy vrou in 1988 vyftien nuwe kerkselgroepe begin het. 'n Rukkie daarna moes hulle vir 6 maande weggaan. By hulle terugkeer was daar 30 nuwe selgroepe en hy glo daar kan minstens 2 tot 3 keer meer sulke huis-selgroepe of huiskerke wees. 'n Ander sendeling berig dat dit hom 30 jaar geneem het om 4 kerke in 'n sekere gebied te plant. Gedurende die laaste 9 maande alleen het daar 65 selkerke tot stand gekom.
- ✚ In een spesifieke gebied in **Indië** met 90 miljoen mense wat basies onbereik is, was daar volgens kerkleiers, na bykans 'n eeu se werk, slegs 28 kerke. Binne nege jaar (1998 – 2007) was daar 2 000 kerke.
- ✚ In **Indië, die Filippyne en Latyns-Amerika** is daar 'n versnelde groei sigbaar t.o.v. kerke wat geplant word. In een gebied in Indië het 'n Christenwerker by 'n Christenorganisasie om hulp kom aanklop vir 'n gebied waar 30 kerke binne 'n paar maande opgeskiet het. Die sendingorganisasie, toegegooi onder aansoeke om hulp, kon eers twee maande later hulp stuur. Teen daardie tyd het die aantal nuwe kerke tot 62 verdubbel. Dit was in 2007. Sedertdien het kerkplanting in Indië nog meer versnel.

Die grootste bemoediging is dat ons *vinnige en vermenigvuldigende groei* in die aantal kerkplantings beleef en dat dit *inheemse kerke* is wat deur die plaaslike bevolking geplant word. Laat ons bid dat die Here meer kerkplanters sal oprig!!

Woensdag 26 Mei 2010

Gebedsfokus op geestelike leiers: Pastoring of Pastors (POPnet)

Wie van die pastorale leiers wat jy ken, ontvang pastorale versorging? Bid asseblief vir pastorale leiers, waar hulle verhoudings onderling opbou en as pastorale versorgers en mentors vir mekaar optree. Bid dat ander pastorale leiers aangetrek sal word deur wat hulle in die lewens van gesonde leiers waarneem. Bid asseblief vir die deel van ondervindings tussen leiers en groepe tot die groter voordeel van die pastorale leiers in die gebied. (*TOPIC SA*, Posbus 13092, Norkem Park, 1631. Tel.: 011 972 6919 of sel: 082 909 9215 of faks: 0866 914 109. Webruimte: www.topicsa.net of e-pos: TOPIC@topicsa.net).

Gebedsfokus op hongersnood: Honger slaan toe in Oos-Afrika

'n Groot voedselkrisis staar Oos-Afrika in die gesig. In Ethiopië het ongeveer 6,2 miljoen mense dringend voedselbystand nodig, terwyl 3,8 miljoen in Kenia 'n uiterste voedseltekort tegemoetgaan. Ongeveer 95% van die Ugandese wat in die Karamoja-gebied bly, ly voedselgebrek, en in Somalië het 3,8 miljoen hulp nodig net om aan die lewe te bly. Prys die Here vir die terapeutiese kosse (energiedigte, mineraal- en vitamienverrykte voedsel) wat deur die *Verenigde Nasies se Kinderfonds (UNICEF)* in Ethiopië gebruik word om die land se wangevoede babas en kinders te behandel. Hou aan bid vir die voorsiening van voedsel, dat die Here genadig sal wees en reën sal stuur, en dat die oeste bo verwagting goed sal wees. (*Children at Risk Prayer News*. Webruimte: <http://www.viva.org/> of e-pos: pray@viva.org).

Donderdag 27 Mei 2010

Gebedsfokus op gesondheid: Sielkundige siektes neem toe

'n Onlangse studie het aan die lig gebring dat een uit ses Suid-Afrikaners aan angstigheid of depressie ly of probleme met middelemisbruik ervaar. Dit sluit nie die ernstiger toestande soos bipolêre gemoedsversteuring of skisofrenie in nie. 'n Geraamde 17% van kinders en adolessente het probleme met geestesgesondheid. Tussen 35-41% van vroue ervaar depressie gedurende swangerskap en in die tydperk na geboorte. Dit is drie keer hoër as die syfers in die hoëinkomstelande. Meer as 40% van mense wat met MIV/VIGS in Suid-Afrika lewe, het 'n diagnoseerbare geestesversteuring. (Webruimte: <http://health.iafrica.com/healthnews/1972280.htm>). Bid vir iemand wat jy ken wat aan enige van hierdie geestesiektes ly en verbind jousef om gereeld vir hulle te bid, dat hulle in Jesus Christus hulp, genesing en vrede sal vind.

Gebedsfokus op die Wêreldbekersokkertoernooi: Akkommodasie

Vir die eerste keer in die geskiedenis kontrakteer FIFA akkommodasie buiten hotelle, soos in nasionale parke, bed & ontbytplekke, lodges en gastehuse. Bid dat die 80 000 kamers wat reeds gegradeer is, goeie en professionele diens aan besoekers sal verskaf en dat elke plek van God se liefde, genade en barmhartigheid sal getuig.

Vrydag 28 Mei 2010

Gebedsfokus op die Bybel: Precept Ministries SA

Precept Ministries is 'n bediening wat deur God daargestel is om mense toe te rus om Sy Woord te bestudeer. Bid vir *Precept Ministries SA* waar hulle bediening vanjaar besig is om oor Suid-Afrika uit te brei. Bid dat nog meer mense die *induktiewe Bybelstudiemetode* sal leer ken as 'n eenvoudige manier om op hulle eie en saam met ander God se Woord op 'n dieper vlak te verstaan. Bid dat hulle ook die mense rondom hulle dissipels sal maak. (*Precept Ministries SA*. Tel./faks: 021 531 1836. Webruimte: www.precept.org.za of e-pos: WendyG@precept.org.za).

Gebedsfokus op Bybelvertaling: Vier nuwe vertalings

'n Bybelvertalingwerkswinkel het in September 2009 in Darwin, Australië begin. Hierdie werkswinkel loods die vertaling van die Bybel in minstens nog vier taalprojekte in die tale van die Aborigines, naamlik Gupapuyngu, Wangurri, Maung en Golumala. Loof die Here dat Hy mense wêreldwyd roep om die vertaling van die Bybel te voltooi vir almal wat tans nie toegang tot die Skrif het nie. (*Wycliffe Prayer Focus Bulletin*. Webruimte: <http://www.wycliffe.org/Pray/PrayOn/WycliffeInternationalPrayerFocus.aspx> of e-pos: Personnel_Southafrica@wycliffe.org).

Saterdag 29 Mei 2010

Gebedsfokus op gesondheid: SA se lewensverwachting verkort

Ongeveer 64% van die huidige Suid-Afrikaanse bevolking is na 1976 gebore (GHS 2007) (*Eighty20, Fact-a-Day*. Webruimte: <http://www.eighty20.co.za/databases/index.cgi> of e-pos: info@eighty20.co.za or fact.a.day@eighty20.co.za). Dit beteken dat 64% van die bevolking jonger as 34 jaar is en dat SA se algemene lewensverwachting gedaal het. Dra hierdie situasie in gebed aan die Here op. Bid dat jonger mense beter vir hulleself sal sorg en hulle lewens aan die Here Jesus sal oorgee.

Gebedsfokus op Bybelvertaling: Oudiobybels vir die Indiese Banjara

'n Middeljarige Banjara-man staan voor ongeveer 100 mans, vroue en kinders terwyl hy 'n klein swart klankspeler vashou. "Ek is so ongeletterd dat ek nie eers my eie naam kan skryf nie. Al die jare het ek ander hoor praat oor die weg na God en hoe om God te volg, maar dit was eers toe ek die Woorde van die Bybel op hierdie *Proclaimer* gehoor het, dat ek geweet het hoe ek my lewe aan Jesus Christus moes oorgee." Hierdie man roep nou twee keer per week die mense van die gemeenskap bymekaar om na God se Woord te luister (*ASSIST News Service (ANS)*. P.O. Box 609, Lake Forest, CA 92609-0609 USA. Webruimte: www.assistnews.net of e-pos: assistnews@aol.com). Dank die Here vir hierdie en ander getuienisse en antwoorde op gebed! Bid dat baie meer die evangelie op hierdie manier sal hoor en dan ook soos hierdie man vir hulle eie mense 'evangeliste' sal word.

Sondag 30 Mei 2010

Onthou om dankie te sê

Volhard in die gebed! Wees daarby waaksaam en dankbaar en bid tegelykertyd ook vir ons. Bid dat God vir ons 'n deur vir die woord oopmaak sodat ons die geheimenis van Christus kan verkondig ... (Kol.4:2-3).

Na 'n intense tydperk van gebed, voorbidding en gebedsoorlogvoering, voel baie voorbidders moeg en wil gaan rus. Alhoewel dit belangrik is om te rus, is daar geen aangetekende geval in die Bybel om dan op te hou om tyd met God deur te bring nie. Hierdie gedeelte in Kolossense moedig ons hier eerder aan om toegewyd en standvastig in ons gebedslewe te wees en nie moeg te word nie. In tye van fisiese rus van ons werksaamhede,

moet ons gebedslewe ook doelbewuste danksegging insluit vir dit wat die Here gedoen het. Laat ons die Here dank vir elke gebed wat gedurende hierdie jaar verhoor is vir die nasies van die wêreld. Te midde van dit alles, bly bedag op die inspraak van die Heilige Gees en vra die Here vir krag om Hom te alle tye te gehoorsaam.

Maandag 31 Mei 2010

Gebedsfokus op redding: Koerantverslaggewers

Koerantverslaggewers word dikwels met gevaarlike omstandighede gekonfronteer as deel van hulle werk om die jongste nuus eerste te kry. Dra hulle in gebed aan die Here op. Bid vir hulle redding. Bid dat hulle sal besef dat die Here hulle beskerm en dat hulle sal besluit om hulle lewens in Sy hande te plaas. Bid dat hulle werklik die waarheid sal najaag en nie sensasie of koerantverkope nie.

Gebedsfokus op Christelike media: YWAM se Media Village in Muizenberg

Die YWAM-basis in Muizenberg fokus op die opleiding van jongmense om hulle te bekwaam in die skepping en bevordering van Christenmedia. Bid asseblief vir wysheid vir die leiers om God se doelstellings vir die *Media Village* te ken en te volg, veral die nuwe vennootskap met *CVC Media*. Bid ook dat studente nie alleen bekwaam sal word in mediavaardighede nie, maar ook sterk sal groei in hulle verhouding met God. Bid ook vir bekwame permanente personeel wat leiding in die opleidings- en produksie-afdeling sal kan neem. (*Media Village*, Graham Vermooten. Tel.: 021 788 9296 of faks: 021 788 9609. Webruimte: www.mediavillage.info and e-pos: graham@mediavillage.info).

Deurbraak

Direkteur van Planned Parenthood bedank

Die direkteur van die *Texas Planned Parenthood* 'aborsiemasjien' waar die *40 Days for Life* gedagte ontstaan het, het bedank. Sy sê sy het tot bekering gekom deur te kyk na 'n ultra-klankvideo van hoe 'n baba tydens aborsie doodgemaak word. Sy sê: "Ek het net gedink ek kan dit nie meer doen nie. Dit was soos 'n skok wat my getref het en ek het net gedink 'dit is nou die laaste keer'". Dit was die woorde van Abby Johnson. Sy sê sy het ongemaklik begin voel met *Planned Parenthood* se besigheidsfilosofie nadat die organisasie, wat die ekonomiese druk begin voel het, haar aangeraai het om te probeer om meer aborsies te doen. Dank die Here vir die antwoord op baie gebede en gaan voort om te bid dat Hy mense tot oortuiging van die waarheid en lewe sal bring. (Webruimte: <http://www.lifesitenews.com/ldn/2009/nov/09110204.html>).

Dinsdag 1 Junie 2010

Gebedsfokus op kinderbeskerming

In Suid-Afrika is daar 407 937 wees- en kwesbare kinders en 53 607 huishoudings met 'n kind aan die hoof geïdentifiseer. Hulle ontvang regeringsdienste deur die *Home Community Based Care programme*. (Eighty20 Fact-a-Day. Webruimte: www.eighty20.co.za of e-pos: fact.a.day@eighty.co.za). Bid vandag vir kinders in nood, dat hulle God se teenwoordigheid in hulle lewens sal kan voel, Hom sal aanroep en sal ervaar dat Hy hulle gebede op werklike praktiese maniere verhoor. Dank die Here vir diegene wat deur programme van hierdie aard versorging kan ontvang.

Gebedsfokus op Swaziland: Om met TB en VIGS te lewe

Volgens die internasionale mediese ondersteuningsorganisasie *Doctors Without Borders (MSF)* het 80% van die TB-pasiënte in Swaziland ook VIGS. Hierdie dubbele epidemie van VIGS en TB beteken dat die lewensverwachting in Swaziland tot 32 jaar geval het. Met 80% van Swaziland se bevolking wat in arm, plattelandse gebiede woon, is dit uiters moeilik om gesondheidsdienste by gesinne te kry. (Webruimte: <http://health.iafrica.com/features/2020822.htm>). Bid dat God binnekort werkers na hierdie oesland sal stuur om in hulle praktiese en geestelike behoeftes te voorsien. Bid dat die mense van Swaziland tot die Here sal roep sodat elkeen die hand van die Here op die nasie sal sien.

Woensdag 2 Junie 2010

Trans World Radio SA

Trans World Radio is besig met die produksie van 'n interessante drama- en besprekingsprogram genaamd *Choose Life*, gerig op die behoeftes van vroue tussen 18 en 25 jaar, veral dié wat aan universiteite en kolleges in Suid-Afrika studeer. Dit het in Februarie vanjaar begin. Bid dat hierdie program baie studente na Christus sal bring en hulle sal help om die regte keuses te maak op 'n baie belangrike stadium van hulle lewens. (*Trans World Radio-SA*. Tel.: 011 974 2886 of faks: 011 974 9960 of sel: 083 387 3037. Luister na *TWR* op DStv radiokanaal 155. Webuimte: www.twr.org.za of e-pos: ddupreez@twr.org.za).

OM Tanganyika

OM Tanganyika plant kerke in die onbereikte nedersettings om die Tanganjika-meer. Poligamie, prostitusie en immoraliteit is deel van die kultuur. Die begrip van die huwelik en Bybelse gesinstrukture is oppervlakkig. Trou is 'n spel en dit is roetine om te trou en te skei. Mans gee nie om vir 'n gesinslewe nie; party het tot soveel as tien kinders by verskillende vroue. Bid vir die redding van hierdie mense en dat hulle die werklike doel van die huwelik sal begin verstaan. (*OM Tanganyika, Good News II Ministry*. Tel. +26 0977 199 322. Webuimte: www.ltprayer.org of e-pos: gnews2@gmail.com).